

Hindari tragedi lemas musim cuti sekolah

Sejak kebelakangan ini kita kerap dikejutkan dengan berita lemas dalam kalangan kanak-kanak dan remaja.

Peningkatan jumlah mangsa lemas amat membimbangkan dan kita risau akan bertambah buruk dalam musim cuti persekolahan kelak yang kebetulan jatuh ketika musim Monsun Timur Laut.

Pelbagai punca menyumbang insiden lemas yang direkodkan selama ini, antaranya termasuklah tergelincir di tebing sungai, lemas ketika mandi di pantai dan lebih tragis lemas ketika cuba menyelamatkan sahabat dan ahli keluarga lain.

Dalam pada itu, beberapa kes berlaku juga menunjukkan insiden lemas terjadi di tempat disyitihar kawasan berbahaya. Sebagai contoh, di sesetengah ka-

wasan pantai, bendera merah dinaikkan pada musim tengkujuh sebagai larangan kepada umum berada di kawasan itu.

Kemungkinan untuk insiden seperti ini berlaku boleh diminimumkan jika orang ramai peka dengan amaran dikeluarkan. Malangnya, amaran itu dipandang sebelah mata dan kebiasaannya, pengunjung terdiri daripada orang luar dan bukan penduduk tempatan.

Justeru, ibu bapa perlu memandang serius perkara ini seterusnya mengambil tindakan pencegahan sewajarnya agar dapat menghindari kejadian lemas daripada terus berlaku.

Misalnya jika keluarga merancang bercuti ke kawasan sungai, air terjun dan pantai ketika cuti ini, disarankan agar sentiasa me-

mantau dan menemani anak semasa bermain air kelak.

Alternatif lain, ibu bapa boleh menunda rancangan ke tempat itu ke suatu tarikh sesuai dan menggantikannya dengan aktiviti lain tidak membabitkan air.

Ibu bapa juga boleh merujuk senarai kawasan berisiko lemas yang dikenal pasti Jabatan Bomba dan Penyelamat Malaysia. Terbaru, dalam petikan berita bertarikh 20 November lalu, JBPM menyenaraikan lima belas kawasan berisiko lemas di seluruh negara berdasarkan kekerapan kejadian itu yang berlaku.

Kawasan berisiko itu termasuklah pantai, air terjun, tasik dan lombong. Penilaian risiko lemas sedang dijalankan jabatan terbabit ke atas kawasan ini, di mana hasil penilaian akan mema-

parkan butiran bahaya kawasan dengan lebih terperinci seperti kepala air, pusaran di dasar dan kecerunan.

Sebagai langkah pencegahan, disyorkan ibu bapa menggunakan musim cuti sekolah ini untuk menghantar anak ke kelas berenang agar dapat mempelajari teknik berenang dan menyelamatkan diri yang betul daripada jurulatih bertauliah.

Tidak mustahil kejadian mati lemas dapat dikurangkan jika ibu bapa lebih peka dan prihatin dalam memantau aktiviti anak. Semoga kita dapat mengurangkan kejadian lemas ketika musim cuti sekolah tahun ini.

Nur Adibah Mohd Ishadi,

Mahasiswa Universiti Putra Malaysia